



Iesus excuse ses Apostres, qui froissoient & mangeoient des espics de bleds au iour du Sabbath. Il guarit la main seiche.

V iour du Sabbath ainsi que Iesus alloit entre les bleds, ses Disciples ayans faim arrachoit des espics pour manger : les Pharisiens voyans cela, luy dirent, Tes Disciples transgressent le Sabbath. Mais il leur dit, N'avez-vous point leu, comment Dauid & les siens ayant faim, mangerent les pains de proposition dediez pour les Sacrificateurs ? ou bien, n'avez-vous point leu en la Loy, qu'és iours du Repos, les Sacrificateurs violent ce iour au Temple sans reprehension. Je vous dis qu'il y en a vn icy plus grand que le Temple; que si vous sçavez bien que c'est, ie veux misericorde & non point sacrifice, vous n'eussiez point condamné les innocents : le Sabbath est fait à cause de l'homme, & non point l'homme à cause du Sabbath. Or envn autre iour de Sabbath, Iesus estant au Temple guarit vn pauvre languissant, qui auoit la main seiche, dont les Pharisiens murmurerent fort : mais Iesus leur dit, Qui est celuy de vous, auquel si sa brebis est cheute au iour du Sabbath dans vne fosse, ne la releue ? cét homme n'est il pas plus qu'une brebis ? Alors les Pharisiens & leurs adherans se voyans confus, conspirerent la mort de Iesus, qui se retira en Iudée.